



www.diarioaruba.com

The way business moves!

DIARIO
Online
E. Maftuntino di Aruba

Aruba ta birando isla di boroto

Ayera mi a ripara un biaha mas con Aruba ta birando un isla di boroto. Mi a bishita SETAR pa regla mi "daño material", pero ora cu mi a sali, mi a desea pa coriente bay pa 24 ora.

Realisando ki problema economico esaki ta trece pa nos isla, mi a hala mi deseo atras.

Ora no tin coriente y bo ta sinta pafo, bo ta scucha hasta vruminganan conversa, y scucha tur insecto cu normalmente bo no sa scucha.

Ta e krikinan so ta traha riba bo nervio.

Bo ta sinta pafo, tira bo wowonan direccion di streanan, y bo ta admira cada strea, cada nubia, y hasta e shinishi, blauw of preto mey mey di nubianan y streanan, y pretende cu bo ta mira tur sorto di fantasia.

Na momento cu mi a baha di auto, celular di un persona cu a staciona su vehiculo banda di esun di mi a zona.

Canando pa entrada, un persona ta bin mi direccion y su celular a cumenza zona.

Drentando e draaideur, e porta cu ta bira pa drenta y sali, ata telefon di otro persona ta zona.

Asina cu bo sali un telefon ta zona di un caminda, y paora bo sinta bek den auto, ainda telefon ta zona bandi bo.

Strafo ta cu den SETAR mes, mi no a tende ningun telefon zona, y dilanti tur bali tabata yen di hende.

Mayoría di nan mal pagado mescos cu mi, cu ta warda ultimo momento pa paga, of paga despues cu nan a corta bo conexon.

E rij tabata asina largo cu mi a cumenza conta minuutnan pa calcula ki ora mi ta sali.

Mi tabata number 12 den rij.

Contanto 5 minuut di servicio pa persona, lo durami un ora ey den.

Si ta menos pa persona, den mey ora mi lo ta afo, y esey a pone cu mi a dicidi di keda den rij.

Ningun celular a zona, pero tabata parce cu tur hende tabata papia den nan mes cu man na oreá.

Nan a tuma e oportunidad pa for di SETAR haci nan yamada, pa ningun hende molestia na cu telefon den SETAR.

Den cantine, mi a conta e mesanan y cantidad di stoelnan dilanti e toonbank y calcula cuanto mesa y stoel por ta tras di e separacion na otro banda. Dilanti tabata tin 3 mes di 4 persona y patas 3 mesa di 2 persona y otro banda ta pa bo calcula.

Den cantine tabata tin un persona so sinta na mesa.

Un dama sinta cu su desayuno su dilanti, y tabata hunga cu su celular.

Mi no sa si ta weganar e tabata hunga, of si ta numernan y nomber di su conocinan e tabata programa.

Tempo cu celular a sali riba mercado nan tabata parce un bloki di cement cu metlanan so por a carga.

Awe bo ta ripara con chiquito nan ta y cu hasta un baby por carga un y kere cu ta aparato pa wanta orina e ta y despues hinke den boca.

TUR HENDE TIN CELULAR AWENDIA

Awe tur hende tin celular y ami ta promove pa hasta regala mama y papa un di nan, y regala madoei y padoei.

Esey ta mi problema, tur hende tin celular (cu excepcion di madoei y padoei).

No tin caminda mas pa sconde pa "tranquilidad di oido".

Tur caminda celular ta "ringggg !!", "bieppppp !!", "Grunnnnnngggg", "squauoukkkk !!", den bo oreá, of toca un cancion cu ta zona mas falso cu un baby batiendo riba xelofon.

Por soporta esaki si nan ta contesta mes ora, pero awendia nan mester realiza prome cu ta "nan" telefon ta zonando. ("ahh ta mi cel.")

Despues nan ta bira piscador y ta trata di pisca e aparato for di tas, for di rugzak, for di un di e saconan di carson, camisa of blusa, unda nan ta kere cu nan a pone.

Tin cu mester conecta riba nan aparato di scucha (hands free) si nan tin un, y finalmente contesta.

Tin ora bo ta haya gana di coge e waya di aparato di oreá, y lore rond di garganta di e doño di "cel", dos tres biaha, y hunga yoyo cune, pasobra e volumen ta asina halto cu bo ta scucha esun cu a yama y esun cu ta contesta.

E SOLUCION PA CELULAR

Mi a pensa mes ora con mi por gana bon placa y bira misionario sin hunga lotto di Florida. Esun di Aruba no a subi 300 mil ultimamente.

Esaki ta mi idea (no conta ningun hende).

Mi lo bin cu un sistema cu na lugar di ring, e telefon ta menciona nomber di su doño.

E ora ey mes ora nan ta contesta.

Si nan no contesta mes ora, e telefon ta grita nan nomber y despues

grita nan adres di cas, ripitiendo esaki varios biaha te cu tur hende sa kende e ta y unda e ta biba.

Pero ora cu nan contesta, e problema no a termina tampoco.

Nan ta papia na telefon keriendo cu esun na otro banda ta surdo.

Nan voz ta cumenza subi y cu mas decibel cu tempo cu a prohibi actividadnan den Entertainment Center.

Nan ta grita, y pa scucha esun na otro banda nan ta subi volumen pa abo tambe tende nan, si bo ta interesa of no.

Mi a siña cu e manera mas facil pa termina un conversacion, ta pa join e dos personanan den conversacion.

Hari ora nan ta hari, bay di acuerdo cu nan ponencianan y un rato despues bo ta tende e palabranan cu ta zona manera musica den bo oreá: "Mi ta yamabo bek!"

Pero hasta ora e termina e yamada, e problema no a termina, pasobra nan por cambia pa "musica", comunica cu cas, y pasa potret cu nan a saca, etc.

Loke mi ta odia mas di celular, ta ora mi tende nan zona.

Esun di mi nunca ta zona y esey ta muestra con impopular mi ta.

Si bo yamami, no sinti bo mes ofendi si di repente mi a corta e yamada despues di "halloo!"

COME BO SO TA HOPI LAF

Pa bini bek riba e dama sinta su so ta desayuna den cantine di SETAR. Si e tabata pasa laf sinta su so, mi por compromete pe, pasobra mi tambe no ta gusta sinta come mi so den restaurant.

Mi no gusta nada di etiketa di restaurant tampoco.

Mi kier ta liber pa tene mi weso mey mey di mi dedenan y chupa delaster "juice" for di e weso y saborea mi cuminda.

Den restaurant tur hende lo ripara cu mi no sa nada di etiketa y lo ripara mes ora tambe kico mi tin bisiti, si man ta pas of no etc.

Na school nos nunca a siña etiketa di restaurant, di manera cu mi no sa ki forki pa usa y pakico, cual tayo cu pan ta di mi, cua serviette pa usa pa tosa of niester aden of pa coba den manishi na mesa.

No tin algo peor cu come bo so den restaurant y realiza cu no tin otro hende pa reparti e cuenta cu bo.

Bay come bo so den un "seafood restaurant".

Bo ta play grandi y encarga "crab" of "lobster".

Nan ta pone poco aparato bo dilanti pa bo usa pa come "crab of lobster" (bisami ta "cangreu y kreeft", ta na aruba mos ta) y bo ta sinti como si fuera ta den stoel di dentista bo ta mirando e instrumentonan aki.

Pa propietarionan di restaurant mi tin mi exigencianan.

Percura pa tur cos riba mi tayo ta cos di come.

Esey kiermeen ningun bladchi, flor of otro decoracion y por favor no feita e berduranan.

Nan ta bira imposibel pa come cu forki di manera cu mi tin cu usa mi dedenan atrobe.

No pone pan na un banda y manteca na otro banda.

Pone nan hunto mey mey di mesa y laga cohe kico mi kier.

Un hende un tempo por poco a hinca forki den mi man prome cu mi a realiza cu ta den su scotter di pan. Mi a pone man

No pone dos diferente kelki di biña mi dilanti. Cola ta smaak mes bon den ki sorto di kelki of glas cu ta.

Si mi ta bebedor di biña mes, tin algo contra si mi bebe di e glas robez? E biña lo tin otro smaak e ora ey?

Despues di a cumenza cu mi di dos botter, lo no importa mes si ta for di mi zapato mi ta bebe biña.

Finalmente, no trece diferente cuchu y forki pa cada curso di e cuminda. Un di cada mes ta bon.

Mi ora ainda, trece e forki y cuchu cu cada curso. Un cuchu y forki pa cuminda principal, un cuchara pa dessert y un "straw" (un pijp) pa soppi.

Cu e cambio aki tur cos ta mas facil pa mi y e restaurant ta spaar un fortuna den gasto di labamento.

Lagami sinti na cas cu e trato tambe.

No tratami stijf cu tur sorto di decencia, mmeer, señor, excelencia, honorable, etc.

Bisami cu si mi no ta gusta e cuminda reclama e chef, y no lubida propina.

Pesey mi ta gusta bay te na San Nicolas na Promenade.

E trahadornan aki ta ponebo sinti bo mes na cas y si tin cu haci un chansa, nan ta hacie tambe.

Nan ta contento cu bo a yega eyman y abo ta contento cu e trato di cuchina pa cushina.

Pero si bo kier siñami etiketa correcto, menciona e restaurant unda bo ta hibami, y percura pa bin cu bo cartera.

Juby Naar.